

## Mengekalkan Keislaman Dalam Era Globalisasi

الْحَمْدُ لِلَّهِ الْغَنِيُّ الْحَمِيدُ وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَهُوَ عَلَىٰ كُلِّ شَيْءٍ شَهِيدٌ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ الْمَبْعُوتُ بِالرَّحْمَةِ وَالْقَوْلِ السَّدِيدِ، اَللَّهُمَّ صَلِّ عَلَىٰ سَيِّدِنَا مُحَمَّدٍ وَ عَلَىٰ آلِهِ وَصَحْبِهِ وَسَلِّمْ تَسْلِيمًا كَثِيرًا.  
أَمَّا بَعْدُ، فَيَا عِبَادَ اللَّهِ اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dirahmati Allah,  
Di hari Jumaat yang mulia ini, marilah bersama kita tingkatkan lagi ketakwaan kepada Allah s.w.t. Taatilah apa yang diperintahkanNya dan jauhilah pula apa yang dilarangNya.

Sidang Jumaat yang dirahmati Allah,  
Semenjak beberapa minggu ini, kita telah diingatkan untuk mengambil kesempatan yang datang bersama arus globalisasi, tetapi dalam masa yang sama, terus berpegang teguh kepada prinsip-prinsip kita sebagai seorang yang cintakan Allah dan RasulNya.

Hari ini saya ingin mengajak pula saudara sekalian untuk melihat sebahagian lagi daripada kesan-kesan negatif globalisasi yang harus kita awasi, dan bagaimana dapat kita mainkan peranan kita sebagai warga dunia yang beragama Islam.

Saudara, globalisasi datang bersama peluang yang banyak untuk bermiaga dan mencari keuntungan. Ini tentunya merupakan satu kesan yang positif. Namun, ia boleh menjadi sebaliknya jika ia jatuh di tangan mereka yang tidak bertanggungjawab. Antara kesan perniagaan sejagat yang kita saksikan kini adalah jurang pendapatan menjadi semakin melebar.

Sebagai contoh mereka di negara-negara membangun yang bekerja di kilang-kilang penghasilan barang berjenama. Pendapatan mereka terlalu sedikit dan mereka dipaksa bekerja dalam keadaan yang dhoif. Ramai kanak-kanak juga terpaksa bekerja demi untuk membantu menyara keluarga. Zaman kanak-kanak mereka bukan diisi dengan senda tawa dan peluang untuk menuntut ilmu, tetapi dengan bekerja dan ada juga yang tinggal di kilang-kilang perusahaan itu. Tanpa pelajaran, sukar bagi mereka untuk keluar dari lingkaran kemiskinan ini dan ianya hanya akan berterusan daripada satu generasi ke generasi yang lainnya. Ini merupakan antara

pertimbangan yang kita perlu ada di dalam menjadi seorang peniaga mahupun pembeli.

Saudara-saudara sekalian,

Bukan saya ingin katakan bahawa perniagaan itu sesuatu yang tidak digalakkan. Sekali-kali tidak. Bahkan Islam sebuah agama yang menggalakkan perniagaan. Rasulullah s.a.w. telah bersabda:

عَمَلُ الرَّجُلِ بِيَدِهِ، وَكُلُّ بَيْعٍ مَبُرُورٍ

*“Sebaik-baik pekerjaan adalah pekerjaan seorang lelaki yang dilakukan dengan tangannya sendiri dan setiap jual beli yang mabrur.”* [Hadith riwayat Imam Ahmad]

Namun begitu, dalam kita menjalankan perniagaan untuk mencari keuntungan, Islam menuntut agar kemajuan ekonomi yang kita kejar perlulah berteraskan keadilan dan kesaksamaan. Firman Allah s.w.t. di dalam surah Ash-Shu'ara ayat 181-183:

• أَوْفُوا الْكِيلَ وَلَا تَكُونُوا مِنَ الْمُخْسِرِينَ

وَزِنُوا بِالْقِسْطَاسِ الْمُسْتَقِيمِ وَلَا تَبْخَسُوا

النَّاسَ أَشْيَاءُهُمْ وَلَا تَعْثُوا فِي الْأَرْضِ مُفْسِدِينَ

Yang bermaksud: "Hendaklah kamu menyempurnakan sukatan cupak-gantang, dan janganlah kamu menjadi golongan yang merugikan orang lain. Dan timbanglah dengan neraca yang betul timbangannya. Dan janganlah kamu merugikan manusia pada hak-haknya dan janganlah kamu bermaharajalela melakukan kerosakan di bumi ini"

Ini jugalah yang ditekankan oleh Ibn Khaldun, seorang tokoh Islam yang terkenal sehingga kini akan sumbangan penting beliau dalam pelbagai jurusan, termasuk ilmu ekonomi. Beliau membincangkan tentang konsep pembahagian kerja dan kepakaran yang boleh meningkatkan ketangkasan ekonomi, tetapi beliau menekankan bahawa semua ini memerlukan keadilan untuk terus kekal berfungsi dengan baik.

Justeru itu, buat kita yang berniaga, pastikanlah kita menjadi peniaga yang mementingkan etika seorang peniaga dan tidak hanya

memikirkan keuntungan semata-mata. Janganlah keuntungan kita itu diambil atas kerugian orang lain.

Buat kita pembeli, kita juga boleh memainkan peranan kita dengan menjadi pembeli yang bertanggungjawab. Buatlah kajian tentang produk-produk yang ingin kita beli. Kemajuan globalisasi juga bermakna bahawa informasi seperti ini mudah kita dapati, maka gunakanlah ia untuk membuat pilihan yang terbaik. Apa yang perlu kita ambil kira sebelum membeli barang bukan hanya tentang kehalalan produk tersebut semata-mata, tetapi juga tentang persoalan etika. Kita inginkan yang halal dan yang toyyiban, iaitu yang baik, dalam setiap pembelian kita.

Justeru, sebelum terburu-buru membeli sesuatu, tanyakanlah kepada diri kita, apakah dengan membeli kasut yang bagus itu kita telah menyumbang kepada perkembangan sebuah syarikat yang menggunakan buruh kanak-kanak tanpa ganjaran yang setimpal? Apakah dengan membeli baju itu kita menyokong penindasan yang berlaku terhadap individu-individu lain? Keputusan terletak di tangan kita sebagai pembeli untuk lebih peka dengan perkara-perkara seperti ini dan membuat keputusan yang bertanggungjawab. Sedarlah saudara sekalian bahawa kuasa dan pengaruh kita sebagai pembeli sememangnya mempunyai impak yang hebat kepada proses penghasilan dalam era globalisasi ini.

Sidang jemaah,

Dengan meningkatnya tuntutan manusia dalam penghasilan barang dan perkhidmatan, semakin meningkatlah prosesproses yang banyak menghasilkan pencemaran kepada persekitaran, contohnya melalui industri perkilangan. Keadaan ini diburukkan lagi oleh mereka yang tidak mengambil langkahlangkah bertanggungjawab untuk mengurangkan kesan pencemaran. Kita baru-baru ini melihat bagaimana cuaca seluruh dunia semakin tidak menentu dengan hujan, taufan dan salji, pada rekod yang amat membimbangkan. Kita semua bertanggungjawab untuk mengelakkan pencemaran. Bukan hanya kerana kita khuatir akan kesan buruknya kepada kita serta anak cucu, tetapi juga kerana ia menjadi tanggungjawab kita sebagai orang Islam untuk melakukan yang sedemikian.

Diriwayatkan bahawa Rasulullah s.a.w. pernah melewati Saad r.a. yang sedang berwudhu, lalu Baginda s.a.w. bertanya: "*Mengapa engkau berlebih-lebihan seperti ini wahai Saad?*" Saad bertanya: "*Apakah di dalam wudhu juga ada istilah berlebih-lebihan?*" Baginda s.a.w. menjawab: "*Benar, sekalipun engkau berada di sungai yang mengalir.*"

Lihatlah bagaimana Rasulullah s.a.w. begitu menitikberatkan pemuliharaan alam, sehingga melarang kita membuat pembaziran hatta dalam ibadah sekalipun. Memang dengan adanya globalisasi, apa yang kita inginkan boleh kita dapat dengan mudah, sehingga kita kerap mengambil ringan kemudahan ini. Maka sebagai umat Rasulullah s.a.w. yang cintakan beliau, kita tidak patut menyumbang kepada pencemaran dan pembaziran sumber alam sedangkan kita boleh memilih untuk menjadi lebih prihatin.

Mulakan proses pemuliharaan ini dengan usaha-usaha mudah, contohnya, membuang barang-barang seperti botol dan kertas di tempat pembuangan khas yang telah disediakan di kebanyakan kawasan perumahan. Sejauh mungkin elak atau kurangkan menggunakan styrofoam dan plastik kerana barangbarang ini menyebabkan pencemaran dan pengeluaran gasgas yang memudharatkan.

Saudara sekalian, Ketika kita melafazkan syahadah *'lailaha illallah wa anna Muhammadar Rasulullah'*, kita pada hakikatnya telah berikrar kepada Allah s.w.t. bahawa kita akan taat kepadaNya dan memelihara dunia ini agar tidak rosak dan binasa. Apakah kita kini sudah mengotakan ikrar kita ini kepada Allah s.w.t.?

Sidang jemaah yang dikasihi, Globalisasi membawa bersamanya banyak peluang untuk kita manfaatkan. Namun dalam kita sibuk meraih peluang ini, hendaklah kitakekalkan nilai-nilai dan etika yang Islam ajarkan kepada kita. Perkembangan kita sebagai individu Muslim perlu kita titikberatkan, tetapi peranan kita sebagai warga dunia juga merupakan tanggungjawab kita yang dituntut agama.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنْ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتُهُ إِنَّهُ هُوَ  
السَّمِيعُ الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ،  
وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ،  
فَاسْتَغْفِرُوهُ فِيهَا فَوْزُ الْمُسْتَغْفِرِينَ وَيَا نَجَاهَةَ التَّائِبِينَ.